



PARS PRIMA.
CONSIDERATIONES
DE
EXCELLENTIIS SACRIFICII
MISSÆ.

CONSIDERATIO PRIMA
PRO DIE DOMINICA.
PRIMA SACROSANCTI MISSÆ
SACRIFICII EXCELLENTIA.

*Missa est Sacrificium
novæ Legis.*

§. I.

Necessitas Sacrificii Divini.

*C*onsidera, in omni Religione, quæ
inanis superstitione non sit, Sacrifi-
cium

PARS

cium aliquod esse oportere. Cum enim supremum veri Numinis cultum ea sibi præfixum habeat, efficacius, quo præcelsum adeo finem consequi possit, medium haud invenerit. Hinc illa cum naturæ, tum scriptæ Legis usitata semper Deo Victimæ offerendi consuetudo, qua Sacrificium inter & Legem arctum adeo vinculum, eaque intercedit necessitudo, qualem humano in corpore cor ipsum cum cæteris membris habere comperimus: ut, quemadmodum hæc mutuis indolere cladibus solent, ita & Gentium Apostolo artestante, *translato Sacerdotio necesse est, ut legis translatio fiat.* (a) Cum igitur gratiæ Lex in eo, quem Deo exhibuit, cultu & cæteras omnes vicerit, & hominum sola, quæ verum Numinis cultum exhibeat, perseveret; decebat omnino, ut eadem Sacrificii sui dignitate, quorquot fuerant, libamina absorberet penitus, infinitoque transcendenter intervallo adeo, ut eorum omnium cumulus ne rudi quidem Minerva potuerit adumbrare excelsum opus, quod secu-

(a) *Hebr. 7. v. 12.*

PRIMA.

,

secuturis temporibus incarnata Dei Sapientia extento brachio perfecit, consumavitque. *Sapientia immolavit vietimas.* (a) Quid igitur esse dicemus tremendum hoc Missæ Sacrificium? Opus videlicet, quo nec terræ sanctius, nec cœlo sublimius datum est conspicari: fidei videlicet nostræ vitam, & Christianæ Legis Sacramentum maximum, ad cujus dignitatem orbi demonstrandam omnes ritus, ceremonias omnes, mysteria omnia collineasse nemo ambigat. Verbo: quidquid bonum, quidquid augustum Ecclesia complectitur universa. *Quid enim bonum ejus est, & quid pulchrum ejus, nisi frumentum electorum, & vinum gerinans virgines?* (b) Et invenire erit nihilominus, qui aut incomposita exteriori specie, aut vagabundo adstant animo? Profecto facessendum inde nobis existimem, ceu maxime earum rerum, quæ geruntur in ara, conspectu indignis, nisi ad modestiæ leges compositos sacer insuper horror invadat. *Pavete ad Sanctuarium meum.* (c)

(a) *Prov. 9. v. 2.*

(b) *Zach. 9. 17.*

(c) *Levit. 26. 3.*

§. II.

Necessitas Sacerdotis Divini.

Considera, infinitæ excellentiæ sacrificio, cuiusmodi Missam esse credimus, non nisi infinitæ itidem dignitatis Sacerdotem, Christum scilicet, digne administrando parem reperiri. Ille igitur Primarius est Offerens, non solum, quod hoc Sacrificium instituerit, (a) neque ideo tantum, quod in idipsum vim omnem ex suis meritis transfuderit; sed etiam & multo magis, quod cœlo receptus, per humilitatem, tanquam per instrumentum Divinitati unitum immediate, obstupescendam, eamque divinam panis in carnem, vinique in sanguinem transubstantiationem efficiat. Præsertim quia Servator noster summo qua intellectus, qua voluntatis studio hanc rem operatur, & per manus mortaliū Sacerdotum contendit actu exercere officium æterni supremique Sacerdotis, tum ut supremam Majestatem summopere veneretur, tum etiam ut nobis quam maxime commendet.

(a) *Suar. tom. 3. in 3. partem, disp. 77. sett. 1.*

det. Ex quo licet intelligere, quam
merito nobis, cum rei sacræ assistimus,
ex divi Chrysostomi sententia non
jam mortalem hominem, sed Christum
ipsum ad aras operari persuadere
debeamus. *Ne Sacerdotem confidere*
(inquit ille) hoc facientem, sed Christi
manum invisibiliter extentam. (a) Certe
Minister ille, quem tu oculis conspicis, tametsi ob dignitatem suam ipsos
Reges ac Principes antecellarat, & ut talis etiam ipsis paradisi incolis in honore
sit ac veneratione; longe majorem
tamen aestimationem meretur, quod
minister sit hujus Sacerdotis invisibilis,
hoc est, nostri Redemptoris. Quippe
ut cum Concilio loquar, *Idem est offe-*
rens sacerdotum ministerio, qui seipsum in
cruce obtulit. (b) Porro nos Deum Sa-
cerdotis loco naestos fuisse, ea est le-
gis nostræ prærogativa, ut, ne ipsa
facti privilegii magnitudo ambiguos
redderet, eandem nobis rerum om-
nium Conditor Pater jurisjurandi in-
terpositione firmandam duxerit. Imo
vero

(a) *Homil. de prod. Judæ.*

(b) *Trid. Sess. 22. c. 2.*

vero quasi neque hac tanta fide satis hominum scrupulis cautum esset, nullam præterea seu pollicitationis, seu jurisjurandi pœnitudinem unquam animo subituram profitetur. *Juravit Dominus, & non pœnitit eum: tu es Sacerdos in æternum secundum ordinem Melchisedech.* (a)

§. III.

Necessitas Victimæ Divinæ.

Considera, quo dignissimum, si quod unquam, in Missa peragi Sacrificium intelligeremus, minime sufficisse solius Sacerdotis excellentiam infinitam, nisi & infiniti pretii victimam, omnique ex parte divina accederet. Vilissimo etiam (quis inficias iverit?) si quem Christus Jesus in hostiam obtulisset, agno immensum vel ex sua dignitate pondus addidisset. At enim in muneribus & offerentis & acceprantis ratio habenda est. Itaque cum Deus Deo, Christus videlicet æterno Patri immolaturus sacratioribus aris accedat, quis non videt, dignam utrius-

(a) *Psal. 109. 4.*

que magnificentia victimam non posse
reperiri aliam, quam vitam ipsius Dei?
Hæc cruento primum modo in aræ
crucis per manus carnificum immola-
ta fuit: nunc incruento per manus Sa-
cerdotum quotidie ad aram offertur in
Missa, ubi adoranda hæc victimæ po-
nitur velut ad quendam mortis statum
redacta; non tantum, quod in duplicitis
inanimatae substantiæ, panis videlicet
ac vini, locum sufficiatur, nec ideo
solum, quod dum in hoc Sacramento
cibus noster efficitur, jam paratus sit
hanc ipsammet vitam perdere; sed
multo magis, quod in consecratione Sa-
cerdos illorum verborum vi corpus &
sanguinem Jesu Christi separet non
secus, ac corpus & sanguis separatur in
agno, qui occiditur. Unde fit, ut ea-
propter in omni sacrificio Redemptor
noster iterum iterumque mortem my-
sticam, non tamen veram obire dica-
tur, uno eodemque tempore vivus,
& quodammodo occisus juxta illud:
Vidi agnum stantem quasi occisum. (a) Hem
tibi igitur trinum perfectum! Sacrifi-
cium

(a) *Apoc.*, 5. 6,

cium omnium possibilium nobilissimum, quod est Sacrificium Missæ: Sacerdotem omnium possibilium nobilissimum, qui est Homo-Deus: Victimam omnium possibilium nobilissimam, quæ est vita Divina. Jam quis amplius admirationi locus, si orbi ostensa tanti mysterii lux non idolatricae modo superstitionis densam caliginem, sed & Mosaicæ legis priorumque libaminum umbras propulsarit? Enimvero non Cometarum duntaxat pestilens vapor ad solis conspectum, sed & stellarum species evanescit.



CONSIDERATIO II.

PRO DIE LUNÆ.

ALTERA SACROSANCTI MISSÆ
SACRIFICII EXCELLENTIA.*Missa est Miracularum
omnium maximum.*

§. I.

*Maximum est ex eo, quod in hoc Sacri-
ficio destruitur.*

Considera, et si Deus creaturarum cursui suam semper omnipotentiam attemperare soleat, & non nisi suo modo invitus, patrandis miraculis sese impendat; conficiendi nihilo minus divini Sacrificii intuitu, tot tantisque miraculis orbem identidem replere consueuisse, ut tremendum hoc mysterium miraculorum ab ipso factorum maximum jure meritissimo dici possit. Patet id primum ex eo, quod immutari, destruique in Sacrificio necessum est. Arcana quippe illa consecrationis

secrationis verba gladii utrinque acutissimi instar arctum, quod natura inter panis & vini substantiam, eorumdemque accidentia strinxerat, vinculum momento citius dirimunt, tolluntque. Hinc perire videoas veteri tegumento expoliatam substantiam; accidentia vero suo destituta fulcro in longum subsistere: cumque & illius destructionem, & horum nulla base pendentium conservationem in alio rerum ordine nec viderit unquam, nec visura sit ætas, tu mihi ipse videois subsistere, cuius rei potissimum stupore defigaris. Vastam aliquam molem Angelorum cuilibet facile acciderit in aëre pendulam figere; at vini saporem, colorem odoremque suis evulso radicibus servare integras nemo illorum unus potuerit. Similiter panis substantiam in aliam aliamque levi negotio verterint cœlestes Spiritus; at perdere eandem penitus, redigereque in nihilum ne quidem cogitarint. Hæc inaudita prodigia sacrosancto Missæ Sacrificio quotidiana sunt, nobisque in primis memoriam

refricant supremi dominii, quod Deus in res omnes habet: deinde, quod ipse sit vitæ mortisque Dominus, & ob infinitam suam perfectionem dignissimus, cuius honoribus creaturæ omnes se toras, quantæ sunt, impendant consumantque: demum, quod nos etiam unacum tota hac mundi mole æque possit annihilare, quemadmodum substantiam panis ac vini destruit. Et feremus adhuc ea humanæ mentis perversitate animos nostros fascinari, ut vel cum maxime hæc fieri credimus, ipsisque propemodum oculis usurpamus, intempestiva levitate solvamur? Deum (S. Prophetæ querela est) Deum, qui habet statum suum in manu sua, non glorificasti! (a)

§. II.

Maximum est ex eo, quod in hoc Sacrifício producitur.

Considera, Deum nostrum terrenis Regibus longe esse absimilem, qui recepto jam more in rerum destructionibus gloriæ verticem collo-

B cant,

(a) Dan. 5. 28.

cant. Ille dum panis vinique substanzias in Missæ Sacrificio destruit, eo fine id agit, ut in earum vicem miraculo infinites majore corpus Jesu Christi reproducat. Siquidem Sacerdotis verba, quibus consecrat, quæque essentiam Sacrificii conficiunt, non ad solam Christi præsentiam, (b) quasi illum e cælo in terras deducerent, (c) sed ad ipsum etiam corpus & sanguinem Servatoris terminantur: eo quidem pacto, ut si nec cælo nec terris Christi Corpus detineri contingeret, illico tamen eorum verborum vi (tanta est scilicet) e nihilo protraheretur. Neque hic vero miraculorum finis; conjunctis veluti viribus in immensum semper excrescere, sequere ipsis majora evadere videntur.

Nam positum sub accidentibus Redemptoris nostri corpus etiam anima ob naturalem nexum comiteretur, necesse est: anima, inquam, sequitur sanctissima, omnibus exornata virtutibus,

(a) *Leff. de perf. Div. L. 12. n. 120.*

(b) *Suar. disp. 50. sect. 4. 5.*

PRIMA.

19

tibus, ditata donis, meritis omnibus
cumulata. Similiter ponitur Unio cum
Persona Verbi Divini: & propter inti-
mam cum hac Verbi Persona, etiam
reliquæ duæ Divinæ Personæ super-
veniunt; adeo, ut, si Trias Illa Sa-
crosancta (quod factu omnino est im-
possible) sua identitate nondum re-
pleret Universa, ubicunque tamen
gentium sacræ species astervarentur,
ibidem & Patrem & Almum Spiritum
ceu Sacrosanctæ Filii Humanitati in-
time præsentes, Filium vero huic ip-
si Humanitati per Unionem hypostaticam
conjunctionem adorare nos oportet.
Quam rem nemo, qui intelligit,
sine mentis excessu satis obstu-
pescat. Quod si enim Elisabethæ tan-
topere admirationi fuit Cognatae suæ
adventus, ut diceret: *Unde hoc nubi,*
ut veniat Mater Domini mei ad me? (a)
Quæ nobis, obsecro, mens, quæ co-
gitatio esse debet, quibus ex fide cer-
tum est, Jesum Christum in ara ad
mortales descendere, intima Sacro-
sanctæ Adorandæque Triados præsen-
B 2 tia

(a) *Luc. I, 43.*

tia condecoratum? Ubi, si unquam alias magnificæ sane pollicitationis illius veritatem experiri licet: *Ad eum veniemus, & mansionem apud eum faciemus.* (a) Interim sacrosancta hæc Christi Humanitas non uni tantum, sed infinitis propemodum affixa locis mirum quantum auget & prodigiorum excellentiam & numerum: toto siquidem orbe pro meritorum præmio diffusam, specie quadam immensitatis donatam credas, privilegio soli alias Divinitati reservato: Namque sic acclamatum ei refert Apostolus: *Dignus est Agnus, qui occisus est, accipere Virtutem, & Divinitatem, & bonorem & gloriam.* (b)

§. III.

Maximum est ex modo, quo id in hoc Sacrificio efficitur.

Considera, in Sacrificio Missæ ceu Miraculorum compendio non operis solum in se ipso spectati substantiam, sed & modum, quo illud effi-

(a) *Ioan. 14. 23.*

(b) *Apoc. 5. 12.*

PRIMA.

51

efficitur, prodigo esse plenissimum. Etenim portenta illa inaudita, quibus & panem destrui, & Christi Corpus confici diximus, nullo strepitu, labore nullo, nulla temporis mora, sed parvularum syllabarum (*boc est Corpus meum*) enuntiatione, atque opera Ministri cujuscunque, seu probus ille fuerit seu improbus, & quidem nullo discrimine perpetrantur. *Quis loquetur potentias Domini?* (a) Quærit hic Psaltes Regius. Quæ hominum vox, quæ Angelicarum mentium facundia tantam tamque absconditam omnibus retro sæculis virtutem pro merito enarrabit? Quis tantam soni humani vim vel fando exprimere valeat, vel assequi cogitando? Etsi enim hic nec movendæ loco festucæ vires a natura acceperit, Divina nihilominus gratia in tantum roboratur, ut etiam Conditoris Divina membra imperio habeat obsequentia. Quare si verbo montium immanes scopulos transferre, si exsiccare marium abyssos, si vastos cœli orbes circumvolvere Sacerdoti concedet.

(a) *Psal. 105. 2.*

cederetur, quantum id esset, si cum priore ejus potentia conferatur? Certe nec primævi illius *Fiat*, quo immensa hæc mundi fabrica prodire ex nihilo jussa est, nec illius alterius (*Fiat nuli secundum verbum tuum*) (a) quo corrupti orbis Reparator in Virginis sinu humanam induit speciem, potior hic haberi ratio aut potest, aut debet. Evidem justum non est, unius mysterii sublimitatem deprimere, ut alterius attollamus excellentiam: nihilo minus pro majori gloria hujus Domini, qui tantam hominibus potestarem concessit, comparationem instituite inter Adventum Christi, quo per incarnationem in uterum Mariæ descendit; & Adventum Christi, quo per Consecrationem descendit in manus Sacerdotum: notabilem profecto inventis excessum. Illa verba Virginis ab ipsa fuere pronuntiata in sua ipsius persona, tanquam hamillimæ Ancillæ tanti Domini. Illa verba Sacerdotum ab ipsis proferuntur in persona Christi, tanquam totidem Vicariis, quibus plenitudo

(a) *Luc.* 1.

nitudo potestatis communicata est. Illa Virginis verba fuere duntaxat per modum conditionis, quæ Divinas Sacro-sanctæ Triados Personas permovere, ut Incarnationis Mysterium tandem executioni daretur: hæc, utut instrumentum supremi Artificis dicantur, ex indita tamen sibi causæ virtute hoc Sacramentum ipsa efficiunt. Beara Virgo aliud non fecit, nisi quod subministrarit materiam Corpori Christi, quod quidem ex ipsa, id est, purissimo ipsius sanguine, sed non ab ipsa formatum est: at vero Sacerdotes, qui instrumenta sunt Christi, dum consecrant, illud reproducunt, & destruunt materiam, quam prius habebant, in manibus, aut (ut melius loquamur) in aliam substantiam commutant. Deinde Virgo illa sanctissima semel duntaxat, quem mortali in carne rerum omnium indigum pareret, concepit; at Legis novæ Sacerdotes toties omnino immortalem creant, quoties quæ per immensam locorum amplitudinem erecta sunt, altaribus operaturi appropinquant. Neque vero lactis cibique necessitatibus obnoxium creant, sed tam

Iem conficiunt, qualis propediem mortalibus in escam cedere & possit, & velet. Denique & enormis illa, quæ natum ex Virgine manebat, infamia patibuli jam in augustum gloriæ trophæum abiit æternum perennaturæ. O igitur veneranda Sacerdotum dignitas, in quorum manibus, veluti in utero Virginis Filius Dei incarnatur. (a) O inquam, veneranda Sacerdotum Christianorum dignitas, quos jam Angelorum nomine vocitare parum, & leve sit; siquidem collara illis in Christi corpus potestas eam, quam in Filium Divina Mater exercuit, suo modo antecellit. Horum quippe beneficio mortalibus datum est, id quod in Virginis gremio semel peractum est, prodigium de die millies innovatum conspicere. O nunquam satis obstupescendam benigni Numinis Charitatem! Et tamen sic Bonitas tua infinita, sic tanta tui in nos amoris prodigia tam grandi, quam monstri instar dies exhorreat, ingratitudine compensentur, ut ad monita tua surdi, ad redamandum te segnes tardique existamus!

(a) Gabr. in Cant. Lest. 4.

PRIMA.

25

CONSIDERATIO III.

PRO DIE MARTIS.

TERTIA SS. MISSÆ SACRIFICII
EXCELLENTIA.

*In Missa exhibetur Deo ha-
nor infinitus.*

§. I.

Divinæ Majestati debetur honor infinitus.

Conserua, legum omnium æqui-
tatem exigere, ut & subditus Su-
periorem, & Dominum servus reve-
ratur, eisque eo majora deferant ob-
sequia, quo illi sublimiore fulgent
dignitate. Jam vero cum Deus in seipso,
simplicissima sua essentia perfectiones
& numero & præstantia infinitas com-
prehendat, infinitæ pariter excellen-
tiæ dignitatisque ejus esse obsequium
oportet. Quæ vero orbis plaga ea
munera suppeditet, quæ decere tanti
Domini Majestatem videantur? *Quid*
dig-

dignum offeram Domino? (a) Quæ oblatio, quæ libamina, quæ holocausta immensam Numinis Majestatem adæquent? Hinc quidem ut debito honore excipiatur, monet Regius Psaltes: *Laudate eum secundum multitudinem magnitudinis ejus.* (b) Illinc vero vilescere videtur, vastoque absorberi Oceano, quidquid Dei conspectum subeat. *Omnis gentes quasi non sint, sic sunt coram eo: & quasi nibilum & inane reputatae sunt ei.* (c) Frustra itaque sumus, si vel pervagari maria, scrutarive monrium viscera, vel steriles hasce arenas exercere, ipsasque adeo cœli regiones, quo dignum Deo tributum comparemus, lubeat investigare. Frustra & incassum hæc omnia: ni Deus ipse humanæ indigenitæ suppetias ferat, dignumque seminus nostris ipse manibus ingerat. Igitur necesse est, ut idem ipse throno sublimis & nostris ab altaribus munere-

(a) *Mich. 6. 6.*

(b) *Psalm 150. 2.*

(c) *Isai. 14. 17.*

munera exigat, & iisdem imponatur,
offeraturque.

Tunc enimvero, si suis e cinea-
ribus resurgat David, obstupescet,
tandem monitioni suæ ex æquo sa-
tisfactum, affirmabitque infinitam Nu-
minis dignitatem sua ex sententia
fuisse honoratam. *Laudate eum secun-
dum multitudinem magnitudinis ejus.*

§. II.

*Talis in SS. Missæ Sacrificio exhibetur
a Christo.*

Considera, cum Christus adverte-
ret, grande hoc summaque Ma-
jestate dignum gratitudinis nostræ
tributum persolvi ab hominibus neu-
triquam posse, eum Missæ Sacrificium
instituisse, in quo cum & res oblata
sit infiniti pretii, scilicet Sacratissi-
mum ipsius corpus, & offerens infi-
nitæ dignitatis, scilicet ipsem Christus,
plus gloriæ Deo reddit, quam
reddere eidem possunt creaturæ om-
nes,

nes, non solum quæ de facto existunt, sed etiam quotquot sunt possibles. Scilicet (quæ Filii ad Patrem vox est) *bostian oblationem noluisti; corpus autem aptasti mibi (a) tunc dixi, ecce venio.*

Porro admirandam hanc, qua corpus suum divinissimum defectuosis nostris victimis subrogare dignatus est, promptitudinem in Missæ Sacrificio Servator Benignissimus peculiari prodigo demonstrat. Hic enim ad nihil pene redactus supremum Conditoris dominium ineffabili sua submissione in immensum extollit, seque infra hominis dignitatem, quasi demittens, vitam sacramentalem, quam de novo per sacerdotis verba acceperat, in Divinæ rursus Majestatis obsequium prodigit. Ut adeo, si unquam alias, hodie vel maxime ab illo exercituum Domino dici possit: *Magnum est nomen meum in gentibus.*

Cur

(a) *Hebr. 10. 8.*

Cur vero magnum tantopere? nisi quod abolitis veteris synagogæ oblationibus, dignam se ubique gentium immolari victimam sciat. In omni loco sacrificatur & offertur nomini meo oblatio munda. (a) Certe si Deum nostris in altaribus Deus ipse pronus adoret, colatque, necesse omnino est, digno adeo cultu ipsius quoque merita adæquari, & immensæ etiam dignitati par obsequium deferri,

§. III.

Talis a nobis quoque exhiberi debet.

Considera, quod unigenitus Dei Filius debitum hoc divinissimæ Triadi Servitutis tributum nequam suo solius nomine oblatum velit; sed vel maxime percupiat, ut idem in hoc Sacrificio commune sit omnibus fidelibus, omniumque nomine offeratur. Nosse enim oportet, eum ex Eucharistico, sub latitatem, orbe omnium cordibus illa iden-

(a) Malach. I. XI.

identidem verba ingerere. *Afferte
Domino gloriam & honorem: afferte Do-
mino gloriam Nomi ejus: adorate Do-
minum in atrio sancto ejus.* (a) Quan-
quam enim nullum non tempus aut
locus divinæ gloriæ honorique natus
factusque sit, longe tamen opportu-
nius sacras tibi ædes ipsamque Sa-
crificii incruenti horam feliges, in-
comparabile inde emolumentum, ma-
jusque tuis muneribus pretium cap-
turus. Vel unum namque Sacrifi-
cium, quod etiam cum indignissimo
Sacerdotum offeras Deo, longe plus
gloriæ tribuit Deo, quam reddere
possint Beati omnes. Fac enim, An-
gelos omnes, Patriarchas, Prophe-
tas, Apostolos, Martyres, Confes-
sores ac Virgines: fac tandem, tur-
bam illam, quam dinumerari non
posse Joannes afferit: imo & ipsam
Cælitum Reginam, quæ omnium
maxime Dominum glorificat; fac,
hos omnes ex una parte conjungi:
certum omnino est, istos omnes tan-
tum gloriæ Deo non reddituros, ut
non

(a) *Psal. 28.*

non infinites major in Deum redundet ex unico Missæ Sacrificio, quod vilissimus etiam mundi Sacerdos peragit. Ex quo manifestum sit, quam merito divinum Missæ Sacrificium ab Ignatio Martyre *Gloria Domini* nuncupetur. (a) Hic profecto est summus ille apex ac meta, ad quam extrinsecā Numinis Gloria unquam possit assurgere; quia inveniri non potest profundior abyssus, quo se dimittere possit incredibilis submissio Jesu Christi. Neque enim satis habebat tragicæ illius Catastrophes Calvariæque opprobriis saturari, nisi novo Humilitatis excessu suam infra homines Majestatem in templis deprimeret: non alia quidem de causa, quam ut Patris Divini cultum, qui antehac exulabat orbe, nunquam interituris sedibus stabiliret. *Prope timentes eum salutare ipsius, ut inhabitet gloria in terra nostra.* (b)

(a) Epist. ad Ephes.

(b) Psal. 84. 10.

CONSIDERATIO IV.

PRO DIE MERCURII.

QUARTA SACROSANCTI MISSÆ
SACRIFICII EXCELLENTIA.

*Sacrificium Missæ est pars
Divinis Beneficiis gratia-
rum actio.*

§. I.

*Quantum Gratitudinis exposant Divina
in nos Beneficia.*

Considera, gratitudinis legem nec
feras latere, quippe quæ bene-
sibi facientium causa inditam ferociem
non raro in obsequium transferant,
ac mititatem. Quanto igitur æquius
est, homines rationis compotes divi-
næque liberalitati tot beneficiis de-
vincetos, eam legem non ignorare?
Id enimvero divina humanaque jura
exigunt, Romana identidem occinen-
te Ecclesia: *Vere dignum & justum est,*
æquum & salutare, nos tibi semper &
ubique

ubique gratias agere, Domine sancte, Pa-
ter omnipotens, æterne Deus. Si Domi-
nus Pater est, cum quod omnes ex
nihili sui abyssō eduxerit, tum quod
eduētos insuper in filios adoptarit;
quis, quæ primæ sunt filiorum par-
tes, subterfugere ausit? Si æternus
est, reosque æterno suppicio exem-
tos beata æternitate donat; quis tan-
tæ bonitatis recordationem ingrato
animo prætereat? Denique si largi-
toris profusissimi Majestas, si amoris,
quo mundum sibi identidem obstrin-
git, amplitudo, si munerum digni-
tas infinita sit, supraquæ, quam dici
possit, excedens; si ex nostra etiam
parte vilitas accedat suo modo infi-
nita: quis adeo proterve demens erit,
ut vel exemptum se gratitudinis le-
ge existimet, vel tantorum bonorum
scaturiginem agnoscere non velit?
Quare aut gratitudinem colere; aut
in vetus nihil reverti necessum
est. Certe nimis probosum alias,
scelestumque foret, vasto semper
gurgite hunc liberalitatis oceanum
haurire, nec unquam in illum gra-
titudinis fluento effundi; cum ta-

men ad locum, unde exeunt, flumine revertantur. (a)

§. II.

Quam insufficientes sumus iis compensandis.

Considera, hominem tot tantisque debitibus exolvendis extreme imparem esse, summaque inopia labrare. Siquidem anima nostra est misera illa vidua, quæ in omnibus bonis suis non nisi duo minuta ad offerendum habet: & haec ipsa non illius, sed Dei sunt. *Tua sunt omnia.* (b) Quapropter utut animi exubereret affectus; res tamen ipsa ab implendo gratitudinis officio semper immensum aberit; ut proinde illud scripturæ nemo non usurpare possit: *minor sum cunctis miserationibus tuis.* (c)

SUS Minor, non modo, si omnium beneficiorum cumulus, sed si quodlibet etiam seorsim, idque minimum con-

(a) *Eccles. 1. 7.*

(b) *I. Paral. 29. 14.*

(c) *Genes. 32. 10.*

consideretur; quandoquidem & istud ab immensæ dignitatis Largitore, & ab infinita in singulos charitate promanat.

Porro quia minimum quodvis bonum, divina sic ordinante Sapientia, eo spectat, ut viam nobis ad possessionem boni infiniti sternat, etiam premium infinitum acquirit, nosque ad infinitam gratitudinem adstringit. Jam vero facile cuique accidet cogitare, quam parum nobis virium supererat totam beneficiorum molem ferendi, si vel unius ponderi succumbamus. Ut adeo si Ecclesiasti monitum (*Da Altissimo secundum datum ejus.*) (a) nostris viribus adimplendum solet; nos denique & vivere, & mori ingratos oporteret. Ex quo igitur ærario, quibusve terræ visceribus tantumdem æris opumque eruemus, ut quæ cum divina largitate contraximus, nomina expungamus? *Quid dignum poterit esse beneficiis ejus?* (b) Conferant sane cœlum terraque, &

C 2 com-

(a) *Eccles. 35. 12.*

(b) *Tob. 12. 2.*

communibus consiliis modum exco-
gitent, quo divinis sese beneficiis
exolvant: scilicet omnes uno ore fa-
teri cogentur, sibi foro cedendum esse,
& vires nostras omnemque facultatem
exhaustas, nisi altaria nostra fiant no-
stra æraria, & pretiosissimus Christi
sanguis sit pretium nostrum, opes no-
stræ. Certe quærenti Prophetæ: *Quid
retribuam Domino pro omnibus, quæ re-
tribuit mihi?* Aliud, quod beneficentiaæ
in infinitæ æquiparari posset, præter Ser-
vatoris Sanguinem, se obrulit nihil.
Calicem salutaris accipiam. (a)

§. III.

*Quam divites nos reddat S. S. Missæ
Sacrificium.*

Considera, in Missæ Sacrificio vieti-
mam nobis obtigisse, divinis pror-
fus æqualem muneribus, quam si Pa-
tri æterno offerimus, accepto nihil in-
ferius reddamus; eo quod in ea bono-
rum omnium authorem reddamus.
Tantum abest, ut conspecto accepto-
rum cumulo animis cadamus. Neque
ingrati

(a) *Psal. 115. 12.*

ingrati vixisse dicemur unquam, si,
quos testamento nobis in Sacrificio le-
gavit Christus Jesus, immensos divi-
tiarum thesauros rite in usus nostros
convertamus. *Dominus retribuet pro me*
(a) dicere unusquisque fidenter potest
cum Davide. Excedant sane numerum
modumque omnem contracta a me
nomina; dominus meus expunget uni-
versa: qui gratitudinis lege adstrictum
voluit, una modum suggerit, quo me
possim eadem exolvere. Id quod haud
obscure demonstrare visus est benig-
nissimus Servator noster, cum ultimæ
accumbens cœnæ, elevatis in cælum ocu-
lis tibi (Patri Cœlesti) gratias agens, fre-
git, simulque, quo par pari repende-
remus, instituto corporis ac sanguini-
nis sui tremendo Mysterio, modum
ostendit. Dignissima plane Deo gra-
tiarum actio, qua & excellentissimus
beneficii finis detegitur, & præcipuum,
quo Christus, ceu humani generis ca-
put ad demerendam pleno obsequio
divinam beneficentiam perfungitur,
officium nobis innotescit. At vero de-
cere

cere nequaquam visum est, ut solus ille, omni mortalium opera exclusa, nostras partes ac onera sustineret. Etiam membra suo conformari capiti oportebat; ut proinde, cum rem divinam accedimus, cœlestem aurifodinam nos subire credamus meritorum Salvatoris nostri. Nam inexhaustis illius divitiis exercemus omnes actus gratitudinis supremo benefactori debitos, dignam scilicet beneficiorum aestimationem, dignam laudem, dignam tanto mœcenare retributionem. Quod si vero persolvere debita negligamus, eum immensum hoc peculium suppetat, qui tandem ingratitudinis notam a nobis avertemus? Quantam, obsecro, desidiosus ille Evangelii servus non incurrerat pœnam, quod infozzo terræ talento unico nihil in domini, nihil in suum commodum verterit! Quid porro illis futurum existimem, qui tot tamque immensos cœli thesauros, nullo inde capto proventu, quasi steriles jacere permittunt?

CONSIDERATIO V.

PRO DIE JOVIS.

QUINTA SACROSANCTI MISSÆ
SACRIFICII EXCELLENTIA.*Sacrificium Missæ est Pro-
pitiorium pro peccatis.*

§. I.

Satisfacit pro reatu culpæ.

Considera, peccatum, cum divinam Majestatem vel aperte vel tacite contemnat, veram quoque summi Conditoris injuriam esse. Quis vero vel verbis exprimere, vel mente assequi possit, quantum se Deus ea hominum delinquentium protervia lacepsitum sentiat ac offensum? Certe præter Deum, cui palmaris adeo irrogatur injuria, id comprehendenter nemo. Peccati malitiam solius Dei oculis aperi- tissime prostare, homines vero latere penitus, satis Propheta innuit, licet oculatissimus alias: *Ab occultis meis munda me.* (a) Quam igitur inire mortalium

(a) *Psal. 18. 13.*

calium sceleratissimi parabunt viam,
ut imminutum tot legum prævaricationibus divinum honorem resarcire
denuo allaborent? *Nunquid placari pos-
test Dominus in millibus arietum?* (a)
Quæ tandem victima sufficiat, ut vel
unius lethalis noxæ piaculum deleat,
nedum pro immensa scelerum collu-
vie ex æquo valeat satisfacere? Extra
omnem controversiam est, nec crea-
turas universas, si in sacrificium se
offerrent, quidquam momenti ad tan-
tum debitum habituras. Necesse igitur
est, ut & hic divinissimus noster
fidejussor solutionem pro nobis pa-
ret; *ipse est enim solus æqua propitiatio
pro peccatis nostris* (b)

Et id quidem abunde præsttit in
monte Calvariæ, ac singulos in dies
renovat supra altare. Ibi profundius
se demittit, quam mente possit con-
cipi, & supplicis in modum adorat
tanquam sacerdos Patrem suum cœ-
lestem, seque tanquam victimam po-
nit reorum loco, quos ob culpas suas
vita

(a) *Mich. 6. 7.*

(b) *I. Joann. 2. 2.*

vita indignos esse palam protestatur, dum pro illis mortem suam offert. Hæc porro divina Jesu Christi submissio divinæ justitiæ reparat omnes injurias, quas eidem per peccata nostra irrogavimus, adeo, ut diffiteri non possit, sibi esse satisfactum. Hinc fit, ut cum justitia præ indignatione hærentibus in peccatorum cœno hominibus copiosiora, & quæ ad emergendum magis idonea essent, media paupo ante negaverit; jam Christi exorantis conspectu mitigata, a concepto furore desistat, & pœnitentiæ donum vel nunc statim, vel suo tempore concedat, quotquot sequi meliora decrevere. Id quod in iis, qui Christum cruci affixerunt, videre fuit: namque alii abs mora se converterunt, reverzabantur percutientes peccora sua, (a) alii paulo post audita concione S. Petri pœnitentiam egere. Hac oblatione placatus (quæ Tridentini sententia est) criminæ etiam ingentia dimittit Deus, gratiam & donum pœnitentiæ concedens. (b)

Quare

(a) *Luc. 23. 48.*

(b) *Trid. Sess. 22. c. a.*

Quare propitiatorium hoc Sacrifício duplici veluti via peccato contravenit: altera, placando Deum offendit, læsumque nostris criminibus summæ majestatis honorem reparando; altera cordium humanorum duretiem suaviter perfringendo; quo in calidas emollita lacrymas tetram adeo peccatorum pestem execrentur.

Væ autem Orbi christiano, si hoc propitiatorio Missæ Sacrificio destitutus contabesceret! Quia enim ratione suis commensuratum sceleribus evadere supplicium posset, nisi arcus hic eucharistica in nube divinis oculis expositus, tanquam pacis vel foederis nobiscum initi signum, iratum judicem clementiæ admoneret? Certe jam pridem dispersi omnes quasi Sodoma fuissimus, & quasi Gomorrahæ similes essimus. (a)

§. II.

Satisfacit pro reatu pœnæ.

Considera, post obtentam culpæ veniam, ut plurimum ingens pœnarum

(a) *Isa.* I. 9.

narum debitum remanere: quod vel in hac vira piis operibus, vel in altera flammis lustricis expungatur. At id ipsum hic ferme, quod in prælio evenit, ubi, dum milites, qui cladi supervent, communi exitio se parant fuga eripere; forte in victrices copias incurunt, & internecione delentur. Ita etiam in strage, quam peccatis Sacra menta intulere, infelices pænae reliquæ penitus conteruntur, dum in Missæ Sacrificium incident. Quæ causa est, ut Mysterium hoc nuncupari merito possit sacrificium justitiæ; siquidem pro debitis, quæ ex legum transgressionibus contraximus, divinae justitiæ ad rigorem satisfacit. *Sacrificate Sacrificium Justitiæ.* (a) Sed enim beneficium hoc conferri homini non potest, nisi omnis ante lethalis culpa, imo & levior fuerit deleta: cum æQUITATI minime congruat, ut ullum debitum condonetur illi, qui æTU est inimicus Dei, eique omni modo bellum movere pergit. Ex quo pronum est conjicere, quam male sibi
con-

(a) *Psal.* 4. 6.

consulant omnes illi, qui vel Sacrificio intersunt ipsi, vel id fieri suis curant expensis, nulla enormium, quæ in animo stabulantur, scelerum habita ratione. Quanquam enim divinum adeo opus uberiori gratiæ ad resurgendum necessariæ comparandæ haud parum conferat, ne suam tamen in abolendo pœnæ debito vim exerat, ipse conscientiæ reatus officit. Diruenda sunt igitur per animi dolorem ac pœnitentiæ susceptionem immania illa peccatorum obstacula, quæ Deum ipsum ab homine, & divinarum torrentem gratiarum, ne animam inundare possit, velut objecto aggere impediunt. Interim quis condignas Redemptori nostro grates refert, quod tot modis nostra in se debita persolvenda suscepit? Fierine etiam potuit, tantam fuisse fidei nostræ debilitatem temponque, ut Mater sanctissima (Ecclesiam intelligo) ad ferendam de sacro diebus festis audiendo legem adacta fuerit, quasi rei divinæ, nisi præcepto obstricti, non assisteremus? Tantum requiritur, ut ditari nos patiamur.

§. III.

Satisfacit sine mensura & modo.

Considera, poenae reatum, quem superesse peccato, tollique divini Sacrificii virtute diximus, nec plene semper aboleri, nec eodem in omnibus decremento imminui, sed pro offerentium vel adstantium meritis ac habitudine plus minusve ex eo debito extingui. Atque haec gravium Doctorum (*a*) sententia, qui assrerunt, Sacrificium hoc pro concurrentium dispositione participari, vel ipsis sacri Canonis verbis videretur confirmari: *Quorum tibi fides cognita est, & nota devotio, pro quibus tibi offerimus, vel qui tibi offerunt, uti loquitur Ecclesia.*

Ad hunc igitur sensum dum Missæ Sacrificium cogitas, pelagus quoddam immensum concipe, quod ex divi-

(a) S. Thom. 3. p. q. 79. art. 5. Cagjet. opusc. 10. tratt. 3. c. 2. Vasquez. disp. 232. c. 7. n. 50. & c. 5. n. 26. Lug. disp. 19. n. 200.

divinissimo Jesu Christi Sanguine ejusque infinitis meritis vastitatem profunditatemque habeat nullo termino circumscriptam, unde fidelium singularis pro affectus, quo Sacrificium vel ipse peragunt, vel offerri procurant, vel denique litaturis intersunt, mensura amplitudineque liberum sit haurire; ex quo rursum apparet, quam imprudenter agant, qui in negotio adeo Divino compendia semper sectantur: præproperos conquerunt ministros, pietatem vero animique ardorem in postremis collocant, & cum Missas celebrari curant, numeri duntaxat, ad quem Sacra ascendunt, rationem habent. Enimvero licet sint ejusdem semper & ponderis & dignitatis, si in se spectentur, Sacrificia nostra; (a) aliam tamen aliamque in hominibus virtutem exerunt. Quo igitur vel actu vel habitu major fuerit Sacerdotis pietas, sanctitasque, eo ubiores fructus enascantur, oportet. Nullum proinde tepidum inter ac præfervidum ministrum discrimen fe-

(a) *S. Th. 3. p. q. 82. art. 6.*

fecisse perinde est, ac si nihil interesset
diceres, sive ample, sive angusto,
contractoque reti piscemur. Quod
vero ad sacrorum multitudinem spec-
tat, absit a me, ut eam quoquo mo-
do curantibus dissuadeam, cum pro
oblationum multitudine divina quo-
que obsequia augeantur: at si rei di-
vinæ majus ardenterque pietatis stu-
dium jungatur, longe altius extule-
rim: quod inde amplior in Deum ho-
nor, in hominem vero plus fructus
redundet, etiam illius, qui ex opere
operato (ut scholæ loquuntur) hoc
est, intuitu meritorum Christi con-
fertur. (a) Quare qui vel semel sacro
altari adstiterit cum majore charita-
tis pietatisque sensu, quam unus aliis
triginta omnino Sacrificiorum obla-
tioni, (b) amplius ille ex unico, quam
hic ex tricensi sacris hauriret satisfac-
tionis. Ut enim S. Thomas (c) ait;
*In satisfactione magis attenditur affectus
offerentis, quam quantitas oblationis.*

Etiam

(a) Lugo disp. 19. n. 203.

(b) Cajet. Opusc. 10. tract. 8. c. 2.

(c) 3. p. q. 79. art. 5.

Etiam qui cruento, quod in ara crucis funestissima pompa peractum est, Sacrificio interfuerere, non eadem bonorum mensuram acceperunt; sed discesserunt cum ea, quæ singulorum fidei, quæ affectus magnitudini responderet. Lictoribus quidem pœnitentiae gratia, latroni ad dexteram paradisus, Joanni (qui Ecclesiam referebat) Mater Divinissima, huic Johannes, & in Joanne fideles omnes testamenti legatione obvenerant; cum interim incredulorum perversitas duriesque non nisi turpissimum ingratitudinis stigma cordibus suis inuitum, & inde commaculatum novis sceleribus animum reportarint.



PRIMA.

43

CONSIDERATIO VI.

PRO DIE VENERIS.

SEXTA SACROSANCTI MISSÆ
SACRIFICII EXCELLENTIA.

*Sacrificium Missæ est Sa-
crificium impetratorium.*

§. I.

Omnis generis bona impetrat.

Considera, divinum Missæ Sacrifi-
cium, cum omnis generis bona
a Deo nobis obtineat, mundi hujus
veluti columnam esse ac basin, cui in-
nixus nequeat interire. Quidquid me-
ritorium Redemptor noster universo
sanguinis sui pretio comparavit, id
omne sacrificii ejusdem beneficio ap-
plicari nobis voluit atque impendi.
Siquidem, ut Angelici fert sententia,

(a) *quidquid est effectus Dominicæ Passio-
nis, est effectus bujus Sacrificii; continet*

Dicitur enīm

(a) *In cap. 6. Joan Lett. 6,*

enim in se Christum passum. Sed ut ad particularia descendamus, imprimis impetrat nobis omnia bona, quæ animæ salutem concernunt, nisi ex parte nostra obicem ponamus. Hinc illa obturatis mentibus adeo operosa admissorum scelerum detestatio; hinc victoria temptationum, tam externarum, quæ a malis sociis, perversis exemplis, & hoste infernali proveniunt, quam internarum, quæ a carne nostra rebelli, ab inveteratis habitibus, ab inconstantia arbitrii nostri proficiuntur. Hinc rursus parta ex domestico hoste trophæa, compressi carnis insolescens tumultus; coercita vetus in malum propensio, atque inconstantis arbitrii firmata vestigia. Hinc illa usque; adeo semper necessaria gratiæ adjumenta, quibus aut lapsus resurgas; aut titubans in vestigio confirmeris; aut denique hæsitans, ad præfixam metam contendas. Adhæc ipse quoque terrenarum, quæ sempiternam felicitatem sæpius haud mediocriter promovent, rerum affluxus, virium robur, corporis incolumitas, concor-

PRIMA.

51

concordiæ pacisque otium ex hoc ipso
bonorum omnium fonte, ex Missæ
Sacrificio promanant. Adversantis
contra fortunæ vices, contagiosæ
luis excidia, terræmotuum strages,
bellorum incendia, famis necessitates,
persecutionum procellas, litium tu-
multus, discordiarum turbines, pau-
pertatis ignominiam, calumniarum
injuriarumque probra, immanem de-
nique cæterarum calamitatum torren-
tem, quis alias, ne ocyus universam
terrarum superficiem inundet, agger-
avertat, nisi quem Ecclesia ex speciali
Dei providentia malis omnibus oppo-
situm agnoscit, divinum scilicet Missæ
Sacrificium, ex quo omnia bonorum
genera in mortales omnes derivari
confitetur? *Omnis benedictione cœlesti &*
gratia repleamur per Christum Dominum
nostrum, quemadmodum habet canon
Missæ. Ut proinde aurea cœli clavis
dici possit, qua concessa Pater cœlestis
nil jam hominibus obseratum volue-
rit, sed bonorum omnium fecerit po-
testatem. Qui proprio Filio suo (verba
sunt Apostoli) non pepercit, sed pro

D 2

nobis

nobis omnibus tradidit illum; quomodo non etiam cum illo omnia nobis donavit? (a)

§. II.

Omni Personarum Conditioni impetrat.

Considera, Missæ Sacrificium non modo bona omnia, sed etiam pro omnibus, quantum est ex parte ipsius, eadem impetrare posse. Nam ut Doctor Angelicus sentit (b) *in immolatione bujus Sacramenti effectus est universalis, pro tota Ecclesia tam vivorum; quam mortuorum, quia in ipsa continetur causa universalis Sacramentorum, quæ est Christus.* Primas autem hinc obtinent iusti, ute pote qui Christo Iesu arctissimo charitatis vinculo seu membra capiti intime coniuncta, ejusdem virtute ac Spiritu animentur. Quos inter etiam veniunt defunctorum manes, piacularibus flammis detenti, quibus Missæ Sacrificium non modo suffragatur tanquam satisfactorium, quo pænam solvant, sed etiam

tan-

(a) Rom. 8. 32.

(b) In cap. 6. Joan. Lect. 6.

tanquam impetratorum, quo veniam
& liberationem obtineant. (a) quem-
admodum ex antiqua Sanctæ Ecclesiæ
consuetudine colligitur, qua non so-
lum Missam offert pro animabus pur-
gantibus, sed etiam in illa pro earum
liberatione orat. Hac eadem vi pec-
catores videas in salutares solvi lacry-
mas; pervicacium corda emolliri in
pœnitentia singultus: imo ipsorum
adeo infidelium cæcitati lumen fidei
oriri. Atque hæc est, quam nemo sibi
defore conqueratur, zeli exercendi
peropportuna occasio, cum quis pro
reducendis ab hæresi deviis, aut con-
vertendis idololatris sacro Missæ offi-
cio præsentiam vel operam suam com-
modat. Siquidem divinum hoc opus
ea pollet virtute, ut ad instar solis,
quo aperte lucis suæ radios diffundere
prohibetur, eo se se occulto penetreret
influxu, recessusque intimos ac remo-
tissimos pervagetur. Proinde nemini
desperatae adeo mentis perditæ-
que conscientiae est invenire, cuius
occur-

(a) Suarez sent. 6. Lug. sent. 9. n. 158.

occurri malis hac via nequeat, vel
aliud quantumvis eximum, & singu-
lare commodum procurari. Hac de
causa Sacerdotem velut Communem
omnium parentem, aut humani gene-
ris orbisque totius legatum licet suspi-
cere, qui cum ad aram gradum pro-
moveret, salutis commode*nostri*
transacturus negotia, divinæ Majesta-
tis petat alloquium. Cui hominum
felicitati cum vipereum illud devotum-
que stygi Caput Antichristus invideat,
funesto orbem Christianum extermini-
o daturus, hanc in primis columnam
concutere, hoc opus subvertere, hoc
excindere Sacrificium molietur, ea
prorsus ratione, qua Holofernes Be-
thuliae imminens succidit aquæ ductus,
ratus, haud faciliore invento cives ad
traditionem compelli posse. Et quam-
quam perfidus ille stygis emissarius di-
vinum hoc mysterium penitus tollere
non possit, sed publicum duntaxat il-
lius usum abrogare; uti tamen sole
non sublato quidem sed tamen eclyp-
sin paciente languere universa conspi-
ciuntur, ita rei Divinæ obnubilato ful-
gore

gore juxta illud Divi Matthæi (a) multorum *Charitas refrigerescet*. Utinam intelligerent cæci mortales,, quale, quantumque bonum in Missæ Sacrificio latitaret! *Si scires donum Dei!* (b) fieri profecto haud posset, quin omnium corda indesinenter ad Altare vellut magnes ad polum suum converterentur, inde non nisi vi ac impetu abstrahenda.

§. III.

In quo fundetur hæc vis Impetratoria.

Considera, unde hæc tanta virtus, quæ bona omnia in mortales omnes diffundat, Sacrificio obvenerit. Scilicet ex ipsis offerentium meritis, & ipsa eorum intercessione promanat, e quibus primas Christus ipse obtinet; proxima vero est Ecclesia, quæ una cum Sacerdote cæterisque adstantibus subrogati Ministri officio perfungitur. Primo igitur JESU Christi meritis precibus-

(a) *Matth. 24. 12.*

(b) *Joa. 4. 10.*

cibusque hæc Sacrificii virtus inniti-
tur, ut qui sempiternum gerens Sa-
cerdotium, & eximio virtutum om-
nium splendore collucens, supplicem
se Patri æterno sistit. *Apparet vulnus*
Dei pro nobis (a) Infinitam quandam
reverentiam Divinæ majestati exhibet,
& triplici potissimum ratione mortali-
bus Deum conciliat. Primum qui-
dem sanguinis sui voce potenter pe-
rrorat, & Sacratissima protendit vul-
nera, quorum vel solus aspectus,
quidquid gratiarum est, nobis valeat
obtinere. Deinde fusas in cruce, &
vita hac mortali preces, uberesque
lacrymas exhibet, quæ ad subvenien-
dum humanis calamitatibus paternum
peccatum emolliant. Demum ceu huma-
ni generis Caput petitiones nostras &
suo subscribere nomine, & ad Patris
alloquium deferre non deditur,
certo semper subsecuturæ opis argu-
mento. Ecclesia quoque ipsa justorum
sanctorumque omnium merita, fidem
præterea suam fiduciæque interpo-
nit, quæ nulla Ministri indignitate

con-

(a) *Hebr. 9. 24.*

confundi possit, aut irritari. *Domine ne respicias peccata mea, sed fidem Ecclesiae tuæ: ita Sacerdos ipse in Canone humillime deprecatur.* Denique & qui Missæ Sacrificio præsentes, suam Sacerdoti operam jungunt, quibusque oblatio illa applicatur, conjunctis Deo studiis supplicant, atque pro fidei ac pietatis ratione, qua erga divinum hoc mysterium feruntur, ad publicos privatosque uniuscujusque libellos supplices optatum consequuntur responsum. Quæ causa est, quod fidem hanc & devotionem, velut ad rei summam, & negotii hujus gravitatem plurimum conferrent, Sacerdos in Canone alleget, dicatque: *Quorum (eorum videlicet, qui offerunt, & pro quibus Sacrificium offerunt.) tibi fides cognita est, & nota devotionio.* Ex quibus rei speique nostræ firmitatem licet arguere, ut quæ justorum omnium precibus, quodque id infinites superat, Dei Filii intercessionibus innitantur. Itaque nil prohibet, quo minus de se quisque, quod olim Propheta, dicere possit.

Factus

*Factus est mihi Dominus in refugium,
& Deus meus in adjutorium spei meæ.* (a)

Quid igitur mirum, si Ecclesia, Mater nostra Sanctissima tantum tribuat Missæ Sacrificio, proque certo habeat, inde orbis totius incolumitatem pendere. *Offerimus* (inquit in ejus vicem Sacerdos) *calicem Salutaris*, *ut pro nostra & totius mundi Salute cum odore Suavitatis ascendat*. Unicum Missæ Sacrificium, si vim ejus incircumscrip̄tam consideres, toti hominum generi salutem, malisque omnibus medelam, afferre possit; ne vero, quantum possit, efficiat, ipsi in causa sumus, qui torpore nostro virtutem ejus obtundimus, immensamque efficaciam nimium, heu, angustis limitibus coarctamus: cum tamen nihil petere, nihil possimus optare, quod non infinitum excedatur victimæ illius pretio, quam in Christi Sacrosancta Humanitate Deo offerimus. Hinc est, quod divus Chrysostomus Angelos hoc præcipuum temporis punctum

(a) *Psal. 93. 22.*

punctum opperiri existimet, quo efficacius pro nobis suas apud omnipotentem preces interponant, cum id cuivis beneficio, gratiae cuilibet obtainendae opportunissimum esse non ignorent: adeo ut alia occasione per quam difficile sit obtainere, quod hoc maxime tempore, dum Missæ Sacrificium intervenit, impetrare non possumus.

Verba præfati Doctoris sunt. *Ipsam Angeli huic temporis invigilant, usq; majore possint cum efficacia pro nobis intercedere.* (a)

Apertum igitur, nostrisque expositum oculis prostat immensarum opum ærarium; & extrema nihilominus cum egestate luctamur. Nempe hactenus substitimus foris, at non jam sic deinceps: non jam sic. Davidis imitemur exemplum, & unusquisque dicamus: *introibo in potentias Domini.* (b)

CON-

(a) *Hom. 3. de Incompreh. Dei nat.*

(b) *Psal. 70. 16.*

CONSIDERATIO VII.

PRO DIE SABBATHI.

SEPTIMA SACROSANCTI MISSÆ
SACRIFICII EXCELLENTIA.*Sacrificium Missæ est idem
cum Sacrificio crucis.*

§. I.

In quo conveniat.

Considera, ut tremendi Missæ Sacrificii prærogativas uno quasi verbo complectamur, abunde sufficere, si hoc idem esse cum crucis Sacrificio asseveremus. Id Ecclesiæ ipsius clarissima verba innuunt, cum ait: *Quoties bujus hostiæ commemoratione recolitur, toties opus nostræ Redemptionis exercetur.* (a) Exercetur, inquit, opus ipsum, ne quis nudam solum renovari hic cruentæ illius oblationis ac Sacrosancti mysterii memoriam arbitretur. Quod ipsum Sacra Tridentina Syno-

(a) *In Orat. Dom. post Pent.*

Synodus docet. (a) *Una enim eademque est hostia, idem nunc offerens Sacerdotum Ministerio, qui seipsum in cruce obtulit, sola offerendi ratione diversa.* Certe victimæ, quæ offertur, est eadem, primarius Sacerdos est idem, eadem igitur & oblatio sit, oportet, paucis solummodo, quæ eam comitantur, circumstantiis diversa: eum fere in modum, quo magnus quispiam Rex, dum in acie Victor, proprio & alieno sanguine conspersus, de suis hostibus triumphat, diversus non est a se ipso, inter togæ & pacis otia intra obscuræ domus angustias delitescente. O sancta Fides! O si tandem mentis nostræ tenebras tuæ lucis plenitudine illustres, pectusque accendas! dispiceremus utique sole meridiano clarius, nos cum templum accedimus, Calvariae montem conscedere, ut manantem e cruce sanguinem pleno sinu excipiamus, eoque animas nostras abluamus. Videremur nobis quasi oculis usurpare, non jam Sacerdotem, sed Christum Jesum ad

in aliis subiectis totia aram

(a) *Seff. 22, c. 2.*

aram facere, admiranda illa sacrorum verborum enunciatione non universam modo cælorum curiam in extaticum stuporem trahere, sed & ipsum inferorum barathrum tremore conutere. Et qui tunc fieri posset, ut quis voluntariis mentis evagationibus, ne dicam, incontinentis linguae, obtutus parum honesti, corporis immodesti excessibus, aliisque tremendi hujus mysterii profanationibus, ut fieri hodie ingemiscimus, locum concederet? Ingrati orbis Dei Filio semper insultantis portentum! Itane vero Redemptoris tui cruentam mortem, ita funeris, quo ipse revixisti, memoriam prosequeris?

§. II.

In quo differat.

Considera, Sacrificium Missæ, etsi, ut diximus, idem sit cum illo crucis, in aliquibus tamen ab eodem discrepare, idque nostro maximo commodo. Primo alias est offerendi modus. Amor quidem ille infinitus,

tus, quo divinus Filius Patrem suum,
quo nos omnes, ut ut vilissimas crea-
turas prosequitur; suscepimus item
Sacerdotii munus exigere videban-
tur, ut ad mundi usque interitum
pro supremæ Majestatis obsequio nos-
traque utilitate in cruce suffixus per-
maneret: At vero cum debita Au-
gustissimo Christi corpori gloria aliud
postularet, orbemque dedecret, hor-
rendo adeo Deicidio per tot Sæcula
funestari, miro prorsus inauditoque
invento effecit, ut & cruentæ Pas-
sionis scena morsque atrocissima ci-
tra ullam crudelitatem in dies mystice
innovaretur, & nulla sanguinis pro-
fusione litantium manus fœdarentur.
Arque hac demum ratione perpetua
factus est victima, quæ non in vete-
ribus solum Sacrificiis ab ipso mundi
exordio immolata fuit, juxta illud
(a) *Agnus, qui occisus est ab origine mundi.* Sed & subsecuturis temporibus
usque ad mundi exitum in nostris al-
taribus immolabitur.

Deinde

(a) *Apoc. 13. 8.*

Deinde incuruentum hoc a cruento sacrificio differt quoad effectum. Siquidem Jesu Christi Passio bonorum omnium causa extitit universalis, eaque velut in immensum cumulum congesit; at divinum hoc mysterium est eorundem bonorum applicatio. Crucis Sacrificium capaces efficit redemptionis; Missæ vero mysterium in ejusdem nos possessionem immittit. Illud in Redemptoris nostri merita jus quoddam ac dominium; hoc eorundem usum confert. Denique etsi una eademque sit crucis & altaris hostia, parisque, hoc est, infinitæ utrobique sanctitatis, hic tamen modo longe magis oblitupescendo existit: namque divinissimum illud corpus ad instar Spiritus aut animæ humano in corpore detentæ, rotum hostiam totam partesque ejus singulas minutissimas itidem totum, integrumque occupat: præterquam quod jam immortalitate donatum iis gaudeat prærogativis, quibus rediviva, cæloque illata corpora condecorantur. Quare quo admirabilior est immor-

immortalis cœloque recepti demissio,
eo etiam amplius honoris, gratique
obsequii in Augustissimam Triadem
transfundit. Quo sit, ut divinum
Missæ Sacrificium, cum unâ etiam præ-
teritarum in monte Calvariæ humiliati-
onum memoriam refriceret, Arche-
typon simul & Ectypon, æternumque
immortalis gloriæ trophæum dici pos-
sit, quod Christus post debellatam atro-
cium inimicorum, mortis scilicet, dæ-
monis ac peccati phalangem longæ
posteritati consignandum viætrici ma-
nu ingentique opere erexit. Justo
igitur horrore contrremiscar, necesse
est, infernale Chaos, quoties ad tre-
mendi Sacrificii confectionem altum
sibi renovari vulnus sentit, & accep-
tæ cladis cogitur reminisci. E diverso
Angelicarum mentium chori Christo
triumphatori maximo partam victo-
riam jure meritissimo gratulantur. Imo
Christus ipse, qui cum viveret, fre-
quentem adeo passionis suæ mentio-
nem fecerat, immenso gaudio exul-
tat, quod eam modo nunquam satis
admirando ubique gentium recoli, in-

novarique in dies conspiciat. Nunc apud te ipsum statue, quid agere, quid cogitare oporteat hominem, cuius causa omnipotens tantum opus, tantamque rerum divinarum Majestatem intendit.

§. III.

In quo antecellat.

Considera, cruentum crucis Sacrificium ab incruento Missæ Sacrificio ex parte etiam superari. Et primo quidem, si temporis ac loci ratio habeatur: quippe semel duntaxat in vertice Golgothæ immolatum fuisse, tresque non amplius horas (totidem enim ex infami ligno Redemptor noster pependit) oblationem illam tenuisse legimus; cum interim in Missæ Sacrificio ubique gentium, horisque diei singulis per omnem, quam late patet, orbem immoletur: & si minus patibulo, certe panis vinique speciebus velut affixus, Sacerdotis manu attollitur, mediator perpetuus Deum inter & homines.

Præterea excellit etiam Sacrificium Missæ Ministrorum Sanctitate. Ad Sacri-

crificium Crucis concurrerunt imma-
nissimi carnifexes per peccatum omnium
maximum, scilicet Deicidium: Ad Sa-
crificium Missæ concurrunt Sacerdotes,
ipsaque Ecclesia per exercitum præci-
puarum virtutum, Fidei, Humilitatis,
Spei, Charitatis, Religionis. Adde,
quod magna spectantium turba in mon-
te Calvariae novis fere novisque scele-
ribus obstrinxerit, cum eorum non
pauci morientem pro se Dominum bla-
sphemo ore prosciderint, multi op-
probriorum plaustris onerarint, pleri-
que, omnes vel aversati sint, vel quis
esser, suo scelere ignorarint. At vero
in cruento Sacrificio adstantium plurimi
aut deponendis criminibus, aut expun-
gendi, quæ apud divinam Justitiam
contraxerant, debitis utuntur: neque
ullus est, qui latenter sub Eucharistiæ
velamine Jesu Christi divinitatem non
revereatur, non adoret. Ubi vides,
Sacrificium Missæ alterum illud crucis
suo modo perficere, eo quod Dominus
ac Redemptor noster illius institutione
sublatum voluerit, quidquid huic ho-
minum perversitas impietatis insperse-

rat, præclarissimis virtutibus in scele-
rum locum suffectis. Hinc sit, ut cum
litari sibi hanc hostiam conspicit divi-
nissima Trias, juxta sapientis effatum
(a) *Gaudio ejus non miscebitur extraneus.*
Liquidissimo, quod nullius culpæ inter-
turbet admixtio, gaudio perfundatur.
Porro divinis hisce consiliis e diametro
adversantur, qui cum tremenda hæc
Mysteria vel peragunt ipsi, vel peragi
adspiciunt, peccatorum inquinari sor-
dibus, vel sacrilegiis pollui, vel mille
incompositæ mentis excessibus sese ob-
stringere non verentur. Quod si nullo
non tempore, nullo non loco peccatum
sit derestandum, quis unquam satis ex-
plicare potest, quam abominandum sit
illud, quod in opere tam Divino, quale
est Missæ Sacrificium, perpetratur?
Divino inquam, opere; siquidem soli
Deo potest offerri. Maledictus itaque,
qui Divino huic operi nefanda immisce-
re non veretur. *Maledictus, qui facit*
opus Dei fraudulenter. (b)